



REPUBLIKA E SHQIPËRISË
MINISTRIA E EKONOMISË, TREGTISË DHE ENERGJETIKËS
DREJTORIA E PËRGJITHSHME E POLITIKAVE TË ZHVILLIMIT TË BURIMEVE
NATYRORE
DREJTORIA MINERARE DHE INDUSTRIALE

URDHËR

Nr 306 , datë 17.4 . 2011

PËR
PROCEDURAT DHE FORMËN E HARTIMIT TË PLANIT VJETOR MINERAR

Në zbatim të nenit 102 pika 4, të Kushtetutës së Republikës së Shqipërisë, dhe të nenit 8 pika 6 dhe nenit 56 pika 2 të Ligjit Nr. 10304, datë 15.07.2010, "Për Sektorin Minerar në Republikën e Shqipërisë";

URDHËROJ :

1. Plani vjetor minerar duhet të realizohet mbi bazën e informacionit gjeologo-minerar, dhe në përputhje me drejtimit e zhvillimit të sektorit minerar, të përcaktuara në programin e veprimit të strategjisë minerare për periudhën 3 (tre) vjeçare.
2. Plani vjetor minerar është kalendarik.
3. Plani vjetor minerar hartohet nga institucionet e Shërbimit Gjeologjik Shqiptar (SHGJSH) dhe Agjencia Kombëtare e Burimeve Natyrore (AKBN) mbi bazën e informacioneve ekzistuese dhe studimeve përgjithësuese që realizojnë këto struktura përgjegjëse.
4. Institucionet e SHGJSH dhe AKBN duhet të përfundojnë hartimin e Planit vjetor minerar dhe ta paraqesin për shqyrtim në Drejtorinë përgjegjëse për veprimtarinë minerare të Ministrisë së Ekonomisë, Tregtisë dhe Energjetikës (METE) jo më vonë se 70 (shtatëdhjetë) ditë kalendarike përpara përfundimit të vitit kalendarik.
5. Institucioni i SHGJSH në Planin vjetor minerar përcakton:
 - a) Zonat minerare të përcaktuara sipas hartës gjeologjike pa informacion gjeologjik të mjaftueshëm, për të cilat kërkohet një veprimtari kërkim-zbulimi. Në këto zona dhënia e të drejtave minerare do të zhvillohet sipas procedurave të zonave të hapura;
 - b) Zonat minerare pa informacion gjeologjik të mjaftueshëm për realizimin e një veprimtarie minerare shfrytëzimi, ku sipas informacionit paraprak kemi të bëjmë me minerale të grupit të mineraleve metalore, jometalore, qymyret dhe bitumet dhe të grupit të mineraleve radioaktive, për të cilat kërkohet një veprimtari kërkim-zbulimi. Në këto zona dhënia e të drejtave minerare do të zhvillohet sipas procedurave

- konkurruese, SHGJSH duhet të përcaktojë kriteret e konkurrimit;
- c) Zonat minerare për të cilat kanë informacionin e nevojshëm gjeologjik për të zhvilluar veprimtari minerare shfrytëzimi bazuar në informacionet ekzistuese dhe studimet përgjithësuese të realizuara. Në këto zona dhënia e të drejtave minerare do të zhvillohet sipas procedurave konkurruese, SHGJSH duhet të përcaktojë kriteret e konkurrimit;
 - d) Zonat minerare për të cilat është realizuar kërkim-zbulimi nga subjektet minerare dhe që nuk janë shndërruar nga këto subjekte në zona minerare shfrytëzimi, kanë informacionin e nevojshëm gjeologjik për të zhvilluar veprimtari minerare shfrytëzimi. Në këto zona dhënia e të drejtave minerare do të zhvillohet sipas procedurave konkurruese, SHGJSH duhet të përcaktojë kriteret e konkurrimit;
 - e) Zonat minerare të rrezikshme nga ana gjeologjike në të cilat veprimtaria minerare mund të ndikojë në jetën e komunitetit dhe ku duhet të ndalohet dhënia e të drejtave minerare;
 - f) Zonat minerare perspektive për zhvillimin e veprimtarive minerare.
6. Institucioni i AKBN në Planin vjetor minerar përcakton:
- a) Zonat minerare për të cilat kanë informacionin e nevojshëm minerar për të zhvilluar veprimtari minerare shfrytëzimi bazuar në informacionet ekzistuese dhe studimet përgjithësuese të realizuara, të cilat mendohen të promovohen atë vit për zhvillimin e veprimtarive minerare. Në këto zona dhënia e të drejtave minerare do të zhvillohet sipas procedurave konkurruese, AKBN duhet të përcaktojë kriteret e konkurrimit;
 - b) Zonat minerare të braktisura nga ana e subjekteve minerare, në të cilat nuk janë nxjerrë të gjitha rezervat minerare dhe vlerësohen për zhvillim të një veprimtarie minerare shfrytëzimi. Në këto zona dhënia e të drejtave minerare do të zhvillohet sipas procedurave konkurruese, AKBN duhet të përcaktojë kriteret e konkurrimit;
 - c) Zonat minerare të konservuara, mbyllura, ose prona të vjetra minerare të braktisura të ish ndërmarrjeve shtetërore për të cilat kanë informacionin e nevojshëm minerar për të zhvilluar veprimtari minerare shfrytëzimi dhe mund të rezultojnë me interes publik për shfrytëzim. Në këto zona dhënia e të drejtave minerare do të zhvillohet sipas procedurave konkurruese, AKBN duhet të përcaktojë kriteret e konkurrimit;
 - d) Zonat minerare që kërkohen të transferohen, për të cilat dhënia e të drejtave minerare është realizuar sipas procedurave konkurruese. Në këto zona dhënia e të drejtave minerare do të zhvillohet sipas procedurave konkurruese, AKBN duhet të përcaktojë kriteret e konkurrimit;
 - e) Zonat minerare të rrezikshme në të cilat ndalohet kryerja e veprimtarive minerare dhe dhënia e të drejtave minerare;
 - f) Zonat minerare perspektive për zhvillimin e veprimtarive minerare.
7. Format i planit vjetor minerar përcaktohet në aneksin 1, bashkangjitur këtij urdhri.
8. Drejtoria përgjegjëse në METE për veprimtarinë minerare realizon të gjitha procedurat e këshillimit të këtij plani me ministritë përgjegjëse për mjedisin, pyjet, tokën bujqësore, trashëgiminë kulturore, turizmin e mbrojtjen dhe njësitë e qeverisjes vendore përkatëse. Procedura e marrjes së opinionit nga njësitë e qeverisjes vendore përkatëse realizohet nëpërmjet institucionit të prefektit, mendim, i cili duhet të përmbajë opinionin e njërive të qeverisjes vendore të shprehur nëpërmjet vendimit të këshillit të njësisë së qeverisjes vendore. Mendimet e Ministrive dhe mendimi i prefektit që duhet të këtë të bashkangjitur dhe vendimet e këshillave të njërive të qeverisjes vendore të qarkut duhet të dorëzohen në METE brenda një afati prej 30 (tridhjetë) ditësh kalendarike. Tejkalimi i këtij afati vlerësohet si miratim në heshtje i propozimit për zonat minerare të qarkut përkatës.
9. Drejtoria përgjegjëse në METE për veprimtarinë minerare realizon të gjitha procedurat e miratimit të planit vjetor minerar nga Ministri.
10. Plani vjetor minerar pas miratimit publikohet në faqen e internetit të METE, në Fletoren Zyrtare dhe pasqyrohet në hartën minerare digjitale jo më vonë se 30 (tridhjetë) ditë


kalendarike përpara përfundimit të vitit kalendarik.

11. Çdo ndryshim apo shtesë në planin vjetor minerar miratohen dhe publikohen sipas së njëjtës procedurë.
12. Për zbatimin e këtij urdhri ngarkohet institucioni i SHGJSH, AKBN dhe Drejtoria Përgjegjëse në METE që trajton veprimtarinë minerare.

Ky urdhër hyn në fuqi menjëherë.

MINISTRI

NASIP NAÇO



Aneksi 1

Formati i hartimit të planit vjetor minerar

1. Zonat minerare të planifikuara për veprimtari minerare në planin vjetor minerar duhet të jenë të ndara në zona të hapura dhe zona konkurruese. Harta e zonave duhet të jetë digjitale.
2. Sipërfaqja e zonave minerare të përcaktuara në planin vjetor minerar duhet të jepet e kufizuar nga pikat me koordinatat respektive në plan, të dhëna në tabelë dhe të hedhura në GIS.
3. Për çdo zonë minerare për të cilën të drejtat minerare do të jepen sipas procedurave për zonat e hapura duhet të përcaktohen:
 - a) Emërtimi i zonës minerare me numër rendor;
 - b) Emërtimi i vendburimit/vendburimeve të mineralit që përfshihen në zonën minerare;
 - c) Emrin e njësisë/njësive se qeverisjes vendore dhe Qarkut/Qarqeve në të cilin ndodhet zona minerare;
 - d) Sipërfaqja e zonës se lejuar minerare;
 - e) Lloji i Mineralit/mineraleve që ndodhen në zonë;
 - f) Vlera e investimit që parashikohet të realizohet në zonën minerare;
 - g) Kërkesat teknike dhe profesionale që duhet të plotësojë kërkuesi i lejes për marrjen e të drejtave minerare në atë zonë minerare;
4. Për çdo zonë minerare, për të cilën të drejtat minerare do të jepen sipas procedurave konkurruese, duhet të përcaktohen:
 - a) Emërtimi i zonës minerare me numër rendor;
 - b) Emërtimi i vendburimit/vendburimeve të mineralit që përfshihen në zonën minerare;
 - c) Emrin e njësisë/njësive së qeverisjes vendore dhe Qarkut/Qarqeve, në të cilin ndodhet zona minerare;
 - d) Sipërfaqja e zonës së lejuar minerare;
 - e) Lloji i Mineralit/mineraleve që ndodhen në zonë;
 - f) Një informacion të përmbledhur gjeologjik të vendburimit/vendburimeve;
 - g) Kapaciteti i rezervave të zonës minerare;
 - h) Cilësia e mineralit/mineraleve të dobishëm;
 - i) Leverdia ekonomike për zhvillimin e veprimtarisë minerare;
 - j) Lloji i veprimtarisë minerare që propozohet të realizohet në zonën minerare kërkim-zbulim/shfrytëzim
 - k) Vlera e investimit që parashikohet të realizohet në zonën minerare;
 - l) Kërkesat teknike dhe profesionale që duhet të plotësojë kërkuesi i lejes për marrjen e të drejtave minerare në atë zonë minerare;